

Èkwo Émọsu Onye Mpuchiru Chileke

¹ Oṣaa bụ olu-opfu Émọsu. Émọsu yì lẹ ndu nche aturu, shi lẹ mkpukpu Tekowa. Oṣaa bụ iphe, ọ phuru l'ophulenyà lẹ k'ehu ndu Ízurelu lẹ teke Uzáya bụ eze ndu Jiuda; tẹme Jierobowamu nwa Jiowashi buru eze ndu Ízurelu. Ọ phuchaa ya; ọ nọada apha labo; tẹme o rwua apha ono, alì nmajeru jiiijiji ono.

² Émọsu pfuru sụ:
“Chipfu nọkwa l'úbvú Zayonu asụ ekiri
bya anọdukwapfo lẹ Jierúsalemu ede ririri.
Èka ndu eche aturu anọduje eche aturu
kpọshihu nkụ.
Tẹme elikota úbvú Kamelu nwukota lwaa.”

Aphụ, aa-nụ ndu Arámu

³ Wakwa iphe, Chipfu epfu baa: “Eshinu Damasukosu mewaru iphe-ẹji ẹto bya eye ẹka lẹ k'eno bẹ mu tee sephuekwaru iya oke ẹhughu mu azụ; kele ẹphe chiwaru ndu Giladu pyaapya g'onye gude mgborígwe echishi ẹswa ẹreshi. ⁴ Mu a-tụ ọkụ l'ulo Hazelu; l'otsua ulo ulo, Benu-Hadadu kpuru kpushia ike. ⁵ Mu e-tsukashi iphe, e gude tụ-chia onu-abata mkpukpu Damasukosu. Mu emee gẹ ndu bu lẹ nsuda Avenu chihu; yẹ onye ono, nọ lẹ mkpukpu Betu-Édenụ gude mgboro-eze l'ẹka

ono. L'a kpua ndu Arámu lẹ ndzu lashia alí Kiru." Nokwa iphe, Chipfu eepfu bu ono.

Aphụ, aa-nụ ndu Filisitayinu

⁶ Wakwa iphe, Chipfu eepfu baa: "Eshinu Gaza mewaru iphe-ẹjì ẹto bya eye ẹka lẹ k'ẹno bẹ mu tee sephuekwaru phẹ oke ẹhu-eghu mu azu; kele ẹphe kpuru oha l'ophu lẹ ndzu bya eworu phẹ ye l'ẹka ndu Edomu. ⁷ Mu a-tu oku l'igbulọ Gaza; l'o tsua ọlo ọlo, a kpuru kpushia ike l'ime iya. ⁸ Ndu bu lẹ mkpukpu Ashidodu bẹ mu e-me g'ẹphe chihu; yee onye ono, nọ lẹ mkpukpu Ashikelonu gude mgboro-eze l'ẹka ono. Mu eworu ẹka ghakpo chiahaa ndu mkpukpu Euronu ke gbaagbaa. Mu emekwapho ge ndu Filisitayinu labua l'iswi g'ẹphe ha." Nokwa iphe, Nnajiuphu, bu Chipfu eepfu bu ono.

Aphụ, aa-nụ ndu Taya

⁹ Wakwa iphe, Chipfu eepfu baa: "Eshinu Taya mewaru iphe-ẹjì ẹto bya eye ẹka lẹ k'ẹno bẹ mu tee sephuekwaru phẹ oke ẹhu-eghu mu azu; kele ẹphe tukoru oha l'ophu, bu ndu a kpuru lẹ ndzu woru ye l'ẹka ndu Edomu; shi nno woru ogbandzu ẹphe l'unwune phẹ nmaa phulaphula. ¹⁰ Mu a-tu oku l'igbulọ Taya; l'o tsua ọlo ọlo, a kpuru kpushia ike l'ime iya."

Aphụ, aa-nụ ndu Edomu

¹¹ Wakwa iphe, Chipfu eepfu baa: "Eshinu Edomu mewaru iphe-ẹjì ẹto bya eye ẹka lẹ k'ẹno bẹ mu tee sephuekwaru iya oke ẹhu-eghu mu azu; kele o gude ogu-echi chia nwune iya

ọso; ọphu ọ phuduru iya obu-imemini ililekpoo; kele ẹhu ghueru iya pho eghu ẹhuka ẹhuka ghukwaseru; teme obu-oku nkiya buru k'ojejoje. ¹² Mu a-tu ọku le mkpukpu Temanu; l'o tsua ọlo ọlo, a kpuru kpushia ike, nọgbaa le mkpukpu Bọzura.”

Aphu, aa-nu ndu Amonu

¹³ Wakwa iphe, Chipfu epfu baa: “Eshinu ndu Amonu mewaru iphe-ẹji ẹto bya eye ẹka le k'eno be mu tee sephuẹkwaru phe oke ẹhu-eghu mu azu; kele unwanyi, du ime l'ali Giladu be ephe wachaaru ibe; opfu l'ephe eme g'oke ali phe kabaa ọsa. ¹⁴ Mu a-tu ọku l'igbulọ mkpukpu Raba; l'o tsua ọlo ọlo, a kpuru kpushia ike l'ime iya. Noo teke aa-nodu echi mkpu ọgu l'eka ọgu a-nodu ada. Oke pherephere ezikwapho l'eka oke mini edze. ¹⁵ L'a kpa onye eze phe le ndzu lashia ali ọzo; yebdua yee ndu-ishi l'ali-eze iya.” Nokwa iphe, Chipfu eepfu bu ono.

2

Aphu, aa-nu ndu Mowabu

¹ Wakwa iphe, Chipfu epfu baa: “Eshinu Mowabu mewaru iphe-ẹji ẹto bya eye ẹka le k'eno be mu tee sephuẹkwaru iya oke ẹhu-eghu mu azu; kele o keru okpu onye eze ndu Edomu oku; jasu o buru ntu. ² Mu a-tu ọku le Mowabu; l'o tsua ọlo ọlo, a kpuru kpushia ike le mkpukpu Keriyotu. Mbụ le ndu Mowabu a-nwushihi l'utsu utsu a-nodu adapheru phe nu; mekpoo mkpu, aa-nodu echiru phe; yee opu-ogu, aa-nodu egbu ẹhuka ẹhuka. ³ Mu e-gbu onye eze

phẹ; bya atuko ndu-ishi l'ime iya gbukọbe ẹphe l'iya." Nokwa iphe, Chipfu eepfu bu ono.

Aphụ, aa-nụ ndu Jiuda

⁴ Wakwa iphe, Chipfu epfu baa: "Eshinu ndu Jiuda mewaru iphe-ẹji ẹto bya eye ẹka ẹ k'ẹno bẹ mu tee sephuẹkwaru phẹ oke-ẹhu-eghu mu azu; kele ẹphe jikaru ekemu Chipfu; ophu ẹphe etsojedu iphe, o toru okpa iya su g'e tsoje. O buru ughoshi ono, nna phẹ jeru etsoru ono dephuru phẹ. ⁵ Mu a-tu oku l'alì ndu Jiuda; l'o tsua ulo ulo, a kpuru kpushia ike ẹ Jierusalemu."

Aphụ, aa-nụ ndu Ízurelu

⁶ Wakwa iphe, Chipfu epfu baa: "Eshinu ndu Ízurelu mewaru iphe-ẹji ẹto bya eye ẹka ẹ k'ẹno bẹ mu tee sephuẹkwaru phẹ oke ẹhu-eghu mu azu; kele ndu Ízurelu reru ndu pfuberekoto gude reta mkpọla-ọchaa; bya eree ndu akpa nri gude reta akpọkpa ẹbo l'ẹchiko. ⁷ Ẹphe azoje ndu ukpa okpa l'ishi zọ-mia l'urwuku, nọ l'alì. Ophu ẹphe ekpejeduru ndu eje iphe-ẹhuka ikpe, pfuru oto. Nna yẹ nwa iya nọdu anọduje ejepfu nwamgboko lanu; shi nno turwua ẹpha mu ono, du nsọ ono. ⁸ Ẹphe nọdu azejegbaa azẹe l'aguga iphe, bu oru-ngweja l'eli uwe, a sọberu l'itumo. Ẹphe nọdu anọduje l'ulo agwa phẹ ono angu mee, e retaru ẹ nre.

⁹ "Mu mebyishiru ndu Amọru l'iphu phẹ. Mbụ ndu hagbaa kẹ kpapherengu kpapherengu g'oshi sida; bya akpọ akpaa g'akpurata. Mu mebyishia mebyi, o mọru l'elikota; bya emebyishia ogbarabvu iya l'uzo alì. ¹⁰ Mu shi l'alì

ndu Ijiputu dua unu dufuta. Mu bya edua unu ụkporo apha labo l'echiegu je emee g'unu Iwuta ali ndu Amoru nworu. ¹¹ Mu byakwapho bya ahota unwu unu unwoke g'ephe buru ndu mpfuchiru; bya ahotakwapho unwu unu unwokoroby a g'ephe buru ndu duru Chileke iche. ?Tobudu eviya be mu epfu-a; unube ndu Izurelu?" Nokwa iphe, Chipfu eepfu bu ono.

¹² "Obenu l'unu meru ndu ono, duru Chileke iche ono; ephe ngua mee; bya asu ndu mpfuchiru g'ephe te epfuhę mpfuchiru. ¹³ Nta-a buru ge mu bya abyazeta unu abyazeta egube ono, ugbo ivu abyazetaje me e doo ya ereshi onoya. ¹⁴ Ndu okpa-egwa taa nahukwa; ophu ndu okpehu du adukwa iphe, ephe egude okpehu phe eme; ophu ndu du ike ogu a-dukwa ike adzo ndzu phe. ¹⁵ Ndu maru agba apfu taa pfukwaru; ophu ndu maru agba oso a-dukwa ike agbala; ophu ndu agbaje inya a-dukwapo ike adzo ndzu phe. ¹⁶ Mbụ je akpachaa l'onye du ike ogu, bu iya be okpoma kachaa adudu agbakwaru oto gbalaa mboku ono." Nokwa iphe, Chipfu eepfu bu ono.

3

¹ Unu numakwa opfu-a, Chipfu pfuru gude epfubyishi unube ndu Izurelu-a; epfubyishi ndu onu-ulo ono l'ophu, bu ndu yebe Chipfu shi l'ali ndu Ijiputu dufuta onoya. O suru-a: ² "O bu unu kpoloko be mu maru l'iphe, bukpo ipfu, nokota le mgboko l'ophu. Noo iphe, meru g'o gude mu je l'anu unu aphu ejo-iphe, unu eme g'o ha."

Ozi onye mpfuchiru Chileke

³ Umadzu ẹ̀bo ?ẹ̀phe aswije ọ̀swi mẹ ọ ọ̀bùdu l'ẹ̀phe zùru mgbede l'ẹ̀phe a-wata aswì ọ̀swi?

⁴ Oduma ?ọ̀onoduje l'ọ̀swa sù a ekiri l'ẹ̀be o gude iphe, oo-ri?

Mbù-a; ?nwegbele-oduma abajẹ hanyìhanyi l'ẹ̀ka o bu l'ẹ̀be abù l'o nweru iphe, o guderu?

⁵ Ẹ̀nu ?l'ọ̀odalahuje l'ọ̀nyà l'alì l'ẹ̀ka adùdu ọ̀nyà, a gbabẹ̀ru iya ọ̀o?

Ọ̀nyà, a gbabẹ̀ru agbabẹ̀ l'alì ?oosweje l'ẹ̀be abù l'ọ̀ dọ̀ru iphe, kpọ̀-sweru iya nù?

⁶ E -gbuaha opu lẹ̀ mkpùkpu; ?ndzù ta agùjedu ndu bu iya nù ọ̀o? ?Ẹ̀phe ta anmajẹ̀du pyaapyaapya?

Teke ọ̀la-l'iswi byapfutaru mkpùkpu; ?ọ̀ bùdu Chipfu meru phẹ̀ iya ọ̀o?

⁷ Tororo bù lẹ̀ Nnajiuphu, bù Chipfu ta adùdu iphe, oomeje l'ẹ̀be ekpuha idzu iya goshi ndu-ozì iya, bù ndu mpfuchiru iya.

⁸ Oduma sùakwaru ekiri. ?Bù onye a-sù lẹ̀ ya ta atsùdu ebvu?

Nnajiuphu, bù Chipfu pfuakwaru opfu. ?Bù onye a-sù lẹ̀ ya a-nọ̀du doo gẹ̀ ya te epfu iphe, Chipfu pfuru?

Iphe-ẹ̀ji ndu Samériya

⁹ Raa ya arara l'iphe, bukpuo ọ̀lo, a kpuru kpùshia ike lẹ̀ mkpùkpu Ashìdodu yẹ̀le ọ̀phu nọ̀ l'alì ndu Ijiputu sù phẹ̀: “Unu je edzùkọ̀o onwunu l'úbvù úbvù alì Samériya hùma ùtsù, ada l'ime iya; yẹ̀le mkpawere, eeme ndibe iya!”

¹⁰ Wakwa iphe, Chipfu epfu baa: “Ẹ̀phe ta amadù g'eemeje iphe, dù ree. Ọ̀lo phẹ̀, a

kpùshiru ike bụ iphe, jiru iya nù bụ iphe, a nataru l'omeliwe; yee iphe, a naru le nfu.” ¹¹ Oo ya bu le-a; wakwa iphe, Nnajiuphu, bu Chipfu epfu baa: “Ohogu l'a-gba ali ono ophorokpo; kwatsushia iphe, bukpuo ulo, akpushiru ike; kwaa okwata l'iphe, bukpuo eka unu kpuru o shihu dungudungu.”

¹² Wakwa iphe, Chipfu epfu baa: “O kwa g'onye eche aturu duru ike nafuta aturu iya l'onu oduma; o buru iphe, o nafutaru kpoloko bu nwoshi-okpa iya labo; ozoo nwibiribe nchi iya-a; nokwa g'aa-dzota-beru ndu Izurelu bu ono; mbu ndu ono, bugbaa le mkpukpu Sameriya; nogbaa l'igburonu iphe-azee phe; yeke nkuku etemu phe.” ¹³ Wakwa iphe, Nnajiuphu, bu Chileke epfu; mbu Chipfu, bu Okalibe-Kakota-Ike: “Unu numakwa iphe-a je agbaa onu-ulo Jiekopu ekebe: ¹⁴ Mboku, mu a-nu ndu Izurelu aphu atupya, ephe tupyaru mu be mu e-mebyishi oru-ngweja, nogbaa le mkpukpu Betelu. Mpu oru-ngweja ono be ee-chikwofu l'o daa l'ali. ¹⁵ Mu alashia ulo, ephe kpuru doberu onanwu; yee ophu ephe kpuru doberu udzu-mini; mbu l'ulo ono, e gude eze-enyi mee omemma ono be mu e-mebyishichaa; l'a kwatsushichaa ulo-eli phe g'o ha.” Nokwa iphe, Chipfu eepfu bu ono.

4

¹ Unu numa opfu-a; unube eswi ali Beshanu ono, nogbaa l'ubvu Sameriya; mbu unube unwanyi ono, emekpa ndu ukpa ehuru; teme o

buru ndu adudu g'ọ dụ pẹ bẹ unu egwe uji; unu -gbeshi; unu asụ nnajiuphu unu pẹ-a: “Unu nū anyi mēe g'anyi ngua!” ² Nnajiuphu, bụ Chileke gudeakwa adu nsọ iya ria angu sụ: “Unu lekwa; ujiku lanu bẹ ee-gudekwa ikekee setachaa unu g'unu ha. Mbụ l'eegude ikokoro, e gude anma ẹma nmatachaa ndibe unu ndu ophu phoduru nu. ³ G'unu hako nanu nanu buru igbulọ bẹ ee-gbuwa chiru unu chighaa. O buru ọzo ẹka aa-nodu achi-phushi unu bụ l'uzo Hamonu.” Nokwa iphe, Chipfu eepfu bụ ono.

Ndu Ízurelu teke alwapfutadu Chileke

⁴ “Unu je mkpukpu Bẹtelu je emee iphe-ẹji! Unu eje mkpukpu Gilugalu je akabakpo ya ro ememe! Unu gweje ngweja unu l'utsu mbokumboku! Unu pfuje oke-lanu-l'uzo-iri unu l'ime ujiku ẹto ẹto! ⁵ Unu woru buredi, e yeru iphe, eekoje buredi woru kpo oku g'ọ buru ngweja obunggo! Unu -nodu anu Chileke iphe ke mmanu; unu araje iya arara! Mbụ-a; unu pfua ya g'a numa-dzuru; unube ndu Ízurelu; kele o iphe ono bụ iphe, aduje unu ree ememe.” Nokwa iphe, Nnajiuphu, bụ Chipfu epfu.

⁶ “Ge mu haru unu; onu nri chihu unu l'iphe, bukpoo mkpukpu unu l'ehu l'ehu; bya emee; ophu o dudu mkpukpu unu ophu nri du; ophu unu alwakwarupho azu lwapfuta mu.” Nokwa iphe, Chipfu eepfu. ⁷ “Mu mekwarupho g'igwe te edzheru unu mini teke o phodukwaruro onwa ẹto teme l'eemeta iphe, emeberu l'alị. O nodu abujeru mu -dzeeru mkpukpu owa-a mini; mu ahaa ndu ophuu. Igwe -dzee mini l'egu ibiya

ọwa; l'ọ haa ibiya ọphuu l'ọ kpọhu jegiri jegiri.
⁸ Ndu mkpukpu labo ọzoo eto nodu anọduje awu gbiigbiigbi eje le mkpukpu lanu eje achọ mini-angungu; ọphu ẹphe ahumajedu mini, asuru phe angungu; ọphu unu alwakwarupho azu lwapfuta mu." Nokwa iphe, Chipfu eepfu.

⁹ "Mu gudewaa nchacha-manu yee atsu-evu gude dapfu unu. Mu gude iya mee ge mgbabu unu yee opfu-vayinu unu dabyiru iphoro. Igube bya atapyashia oshi olivu unu; yee oshi figu unu; ọphu unu alwakwarupho azu lwapfuta mu." Nokwa iphe, Chipfu eepfu.

¹⁰ "Mu bya emee g'ejo iphe-ememe wata unu ememe egube ono, mu meru; o mee ndu Ijiputu ono. Mu gude ogu-echi gbushia unwokorobya unu; bya erwuta inya unu kpu ya le ndu. Mu bya atsu-jia imi unu atsu-ji l'ishishi iphe, shigbaa l'eka ndu ojogu unu dogbaaru; ọphu unu alwakwarupho azu lwapfuta mu." Nokwa iphe, Chipfu eepfu.

¹¹ "Mu haru mkpukpu unu mebyishia egube ono, mu mebyishiru Sodomu waa Gomora ono. Mbụ l'unu dupleho ge nku-oku, a lofutaru l'eka oku eke iya; ọphu unu alwakwarupho azu lwapfuta mu." Nokwa iphe, Chipfu eepfu. ¹² "Oo ya bu le-a; wakwa iphe, mu e-me unube ndu Izurelu baa. Temanu-a; eshinu mu e-me unu iphe ono; unu kwakobekwa akwakobe ejepfu Chileke unu; unube ndu Izurelu!"

¹³ O kwa onye ono,
 bu iya meru ubvu;
 bya edobe pherephere;

mbụ onye ewojeru
 iphe,
 ọori kpuhaa goshi nemadzu;
 onye ono, emeje g'utsu
 gbahụ ọchii;
 tẹme ọ nọdu azọ garamu
 garamu l'eli úbvú,
 nọgbaa lẹ mgboko.
 Epha iya bukwa Chipfu;
 bya aburu Chileke,
 bu Okalibe-Kakota-Ike.

5

Erwubvu ẹhu ndu Ízurelu

¹ Unu nụmakwa opfu-a; unube ọnu-ulo
 Ízurelu; mbụ erwubvu ẹhu unu-a, mu erwu-a:

² “Ndu Ízurelu, bu nwamgboko
 ono yee nwoke teke
 akwaswee ono
 daakwaru darwua ali;
 ọphu ọ gbeshibaekwa
 ọzo.

A parụ iya haa l'ali l'eka
 ọ dabyiru;
 ọphu ọ dudu onye palia ya.”

³ Wakwa iphe, Nnajiuphu, bu Chipfu epfu
 baa: “Mkpukpu, chi unu ojogu labo l'ukporo
 ojogu iri ejeru Ízurelu ogu bu iphe, oo-gude lwa
 bu ukporo ojogu ise kpoloko. Mkpukpu ọphu
 chikwanu ukporo ojogu ise eje buru ojogu iri
 a-lwa.”

4 Wakwa iphe, Chipfu epfu anu onu-ulo Ízurelu: “Unu choo mu; dzuru ndzu. 5 Unu ba achokwa Betelu! Ophu unu ejekwa Gilugalu! Unu ta atugbukwa jeshia Biye-Sheba! Kele ndu Gilugalu be aa-kpukwa le ndzu; l'e mee Betelu; o to dudu iphe, oo-bu.”

6 Unu chokwaa Chipfu dzuru ndzu. Odumeka be oo-gbakwa onu-ulo Jiosefu ophorokpo g'eka oku etsu. Mbụ l'oo-tsu iya tsufu; o to dudu onye a-suru iya egbota le Betelu. 7 Nshio unube ndu ono, ewojeru ikpe, pfuru oto mee iphe, atso ilu ono; teme unu nodu ewojeru apfubekoto gwoo l'ali.

8 Onye ono, bu iya meru
 kpokpode,
 bu Puleyadesu;
 bya aburu iya meru
 kpokpode, bu Orayonu;
 onye emeje tsukiribaa
 ochii l'o buru iphoro
 nchi-abohu;
 teme o nodu ejikputeje
 eswe mee ya l'o buru
 enyashi;
 onye ekuje mini,
 doru l'eze-enyimu oku;
 l'o bya eworu iya
 dzeeru eliphe l'ophu;
 o kwa Chipfu bu
 epha iya.

9 Onye emeje ge mkpurupyata
 loo vaa so-kpute ndu
 ike du;

tẹme ọ nọdu emeje gẹ
mkpukpu,
a kpụ-pheru igbulọ
mgburugburu buru
mkpurupyata.

¹⁰ Onye abajeru unu mba l'edupfu be unu akpoje ashị; tẹmanu ọ buru onye epfuje ire-lanụ be unu anọduje akpofu akpofu. ¹¹ Ọo ya bu lẹ-a; eshinu unu azoje ndu ukpa tolitoli; tẹme unu nọdu ekebutajẹ phẹ g'ẹphe nụ unu ereshi; be a makwaru-a l'unu pyishiru mkpuma gude kpushia ọlo; obenu l'ọ tọ dudu ọphu unu e-bu. A makwaru-a l'unu kowaru opfu-vayinu, du ubvu l'enya; obenu l'unu taa ngudu mee, shi iya nụ; ¹² kele mu maru g'emeswe, unu mesweru habe igwerigwe; bya amaru g'iphe-ẹji, unu meru habe shii. Unu anọduje emekpa ndu pfuberekoto ẹhu; tẹme unu nọdu anọduje eri uphalazu; tẹme ọphu unu ekpejedu ndu ukpa ikpe, pfuru ọto l'edupfu. ¹³ Ọo ya bu l'onye nweru egomunggo e-dobejeepho ọnu doo me ọ dajewaa nno; kele teke ono bukotakwa ẹjo mboku.

¹⁴ Unu choje iphe, du ree; g'ọ tọ bu iphe, du ẹji; k'ọphu unu a-nọdu ndzu. Noo teke Chipfu; mbu Chileke, bu Okalibe-Kakota-Ike e-swiru unu; egube ono, unu asuje l'o swiru unu nta-a ono. ¹⁵ Unu kpoo ẹjo-ememe ashị! Unu eyee eme iphe, du ree obu! Unu kpeje ikpe, pfuru ọto l'edupfu; ?a maru; ?Chipfu; bu Chileke, mbu Okalibe-Kakota-Ike a-phuru unu obu-imemini; mbu unube nwa ndu ọphu phoduru nụ lẹ ndu ọnu-ọlo Jiósẹfu.

16 Ọo ya bụ ịe-a; wakwa iphe, oopfụ; mbụ Nnajiuphu, bụ Chipfụ; bya aburu Chileke; bụru Okalibe-Kakota-Ike: “Ụzu-ekwa a-nọdu atụ l'iphe, bụkpoo gbororo. Ẹkwa aphụ anọdu ada l'edupfụ l'edupfụ. L'e kua ndu akoje opfụ g'ephe bya adobe ekwa raahaa; kua ndu maru aka ẹreshi ekwa g'ephe bya akwashia ekwa ike. 17 Ụzu-ekwa a-nọdu atụ l'ekameka, a kọru opfụ-vayinu; kele ẹka unu dọru bẹ mu a-bya eshijaa ẹbo ghata.” Nokwa iphe, Chipfụ eepfụ bụ ono.

18 Nshio unube ndu ọogu g'asụ l'eswe ke Chipfụ rwuwaru! Sụ-a; ?bụ gụnu kparụ iphe, eswe Chipfụ agụ unu ẹgu? Mbọku ono a-bụkwaru ọchii; ọ tọ bụkwaru ìphóró. 19 Ọo-dụ g'egube-a, aa-sụ ịe nwoke nahuru oduma; o gbapfụ agụ. Ọ nahụ ono bya abahụ l'ulo iya je anọdu woru ẹka tų-kobe l'igbulọ; agwọ bya ataa ya. 20 Eswe Chipfụ a-bụkwaru ọchii; ọ tọ bụkwaru ìphóró. Mbụ l'ọo-gbakota tsukiribaa; k'ọphu bụ l'ìphóró taa dükpoda ya ililekpọ.

21 “Ọbo-iphe, unu abọru mu bẹ mu kpọkwaru ashi; teme ọphu mu anatakwaru iya; ọphu edzuko, unu edzukojeru mu adujeekwa mu ree. 22 A makwaru-a l'unu egweje ngweja-akpo-ọku nụ mu; unu ewota ngweja-nri gude bya mu agwagwa; obenu ịe mu ta anatajedu iya. Unu -họtachakponu iphe ahota gude bya egweeru mu ngweja-ẹhu-guu; ọ tọ dükwa iphe, mu agube iya. 23 Wofukwaru mu ụzu ono, dų l'ebvu ono, unu agụ ono; kele mu ta angabejekwa nchị k'anuma iphe, nkwa unu ada. 24 Obenu ịe-a; g'ikpe, pfuru ọto watanu asọ gborogboro ẹ

nggele! G'apfubekoto watanu aso g'enyimu, ta aso-buhujedu aso-buhu!

²⁵ “Su-a; unube onu-ulo Izurelu; ukporo apha labo be mu l'unu noru l'echiegu. ?Unu shi agwaje mu agwagwa l'eka ono? To ?unu shi anuje mu iphe? ²⁶ Obenu le nta-a bu iphe, unu kporu obu yeru bu nshi onye eze unu, bu Sakutu; yee iteshi ibe unu, bu Kayiwanu; mbu kpokpode ono, unu gwotaru l'onwunu ono. ²⁷ Noo g'o gude mu je l'eme g'a kpua unu le ndzu je aghaa mkpukpu Damasukosu aghagha tugbua.” Nokwa iphe, Chipfu eepfu bu ono; mbu onye ono, epha iya bu Chileke bya aburu Okalibe-Kakota-Ike.

6

Oshi, akuru ndu akpa ntusaru-ehu

¹ Nshio unube ndu akpa ntusaru-ehu l'ubvu Zayonu; mekwapho unube ndu no l'ubvu Sameriya ari lo to duedu iphe, adu ike eme unu; mbu unube ndu a maru amaru, shi l'oha, bu ishi oha l'ophu, bu ndu ono, onu-ulo Izurelu anoduje ejepfu. ² Unu jenu mkpukpu Kalune je ahuma go gbaru! Unu eshi l'eka ono jeshia Hamatu; mbu eze mkpukpu ono! Unu eshi kwapho l'eka ono jeshia Gatu, bu mkpukpu ndu Filisitayinu! ?Unu kakota ali-eze-a g'ephe ha ree too? ? Ali phe ka k'unu osa to? ³ Mbu unube ndu woru ejo mboku dobe uzanya uzanya; o buru okposhi omeliwe be unu pataru dobe onwunu ntse ntse. ⁴ Ndu bu iphe, ephe azeje aze bu iphe-aze, e gude eze-enyi memaa. Teme ephe

nọdu azeje manyọo l'iphe-azẹe pẹ. Nri, ẹphe erije bu anu unwu-aturu, shigbaa l'igwe aturu pẹ; yẹ unwu-eswi, shigbaa l'ikpoto eswi pẹ. ⁵ Ndu anọduje agụ-phe jogojogojogo ebvu akpọ une eye iya; emeshigbaa iphe ọphúú, e gude agụ ebvu gẹ Dévidi. ⁶ Iphe, unu egudeje angụ mẹe bu eze uwaka. O buru manụ, kachaa eshi mkpọ bẹ unu anyije. Obenu l'unu ta agujedu aphụ ọla-l'iswi-a, ọnu-ulo Jiófẹfu ala-a. ⁷ Noo g'ọ gude unu je l'aburu ndu mbụ, ee-vuru ọzo kpua lẹ ndzụ. Obo-iphe ndu ono, azeje manyọo ono aburu bugemu.

Chipfu akpofu eku-onwonye kẹ ndu Ízurelu akpofu

⁸ Nnajiuphu, bu Chipfu gudewaa onwiya ria angụ; mbụ lẹ Chipfu ono, bu Chileke; bya aburu Okalibe-Kakota-Ike ono pfiwaru sụ: “Eku-onwonye, oshilokpa Jiékọpu eku bẹ mu akpofu akpofu. Mbụ l'ulo ulo, ẹphe anọduje zeeru ndzụ g'ọ ha bẹ mu kporu ashị. Noo g'ọ gude mu je l'eworu mkpukpu-a; yẹ iphemiphe, dọ iya nọ ye l'ẹka ndu ọhozo.”

⁹ Teke umadzu iri phoduru l'ulo lanu; ẹphe anwuhukwapho. ¹⁰ Teke abubu pẹ, bu onye a-kposhi odzu pẹ ono oku byaru g'ọ chita pẹ chipfu l'ulo ono; o jia onye domikwaduru onwiya l'ẹka ono sụ iya: “?O nweru onye gụ l'iya nọ l'ẹka ono?” O sụ: “Waawaa-o!” L'ọ sụ: “Ngwa; dobeekwapho ọnu ngu doo! G'anyi te ejekwa ekusweta ẹpha Chipfu!”

¹¹ Kele Chipfu sọwaru l'ọ noo g'ọo-dụ. O je l'etsukposhichaa oke ulo ono etsukposhi;

tsukpọshia ndu ọp̄hu b̄ ụlo nsh̄j̄i l'ọ dakaa nanu nanu. ¹² ?Inya agbajẹ ọso l'ẹka d̄ ụ mkpuma mkpuma? Tọo ?eegudeje eswi akọ ọkoro l'ẹgube ẹka ono? Obenu l'unu mewaru ikpe, pfuru ọto; ọ buru iphe, egbu egbugbu; bya emee akpuru, apfubekoto a-mi; ọ buru iphe, atso ilu.

¹³ Unu ete ẹswa l'ẹka unu lwutaru mkpukpu Lodeba. Teme unu nodu asuje: “?Tobudu l'ike okpu k'anyi be anyi gude lwuta mkpukpu Kanayimu?”

¹⁴ Wakwa iphe, oopfu; mbu Chipfu, bu Chileke; bya aburu Okalibe-Kakota-Ike: “Mu e-je akpatsu oha, a-bya etso ngu ogo; gube onu-ulo Izurelu. Epehe e-meẹ ngu pho ewere; e -shi le mkpukpu Lebo-Hamatu jasu le nsuda Araba.”

7

Igube; waa oku; waa iphe, eegudeje akpu igbulọ g'ọ pfuru ọto

¹ Wakwa iphe, Nnajiuphu, bu Chipfu goshiru mu baa: Oodozi igube, a-bya bya atapyashia iphe, e meberu l'ali, e-fushi ome me a -kpatachaepho ke mbu. Ke mbu ono bu ophu aanuje eze kele o bu iphe, rwuberu iya nu.

² Tobudu iya bu; epehe tukoeppo iphemiphe, futaru l'ali tafu. Mu chia mkpu su: “Gube Nnajiuphu, bu Chipfu; gunaa nvu jiko! ?Denu g'unwu Jiekopu e-shi wafu l'ebe abu l'ọ baru ishi?”

³ O buru iya bu le Chipfu agbanwee ẹka l'eme iphemiphe ono. Chipfu bya eyee onu su: “Owaa taa nwukwa!”

⁴ Wakwa iphe, Nnajiuphu, bu Chipfu goshiru mu baa: Nnajiuphu, bu Chipfu kuru oku, enwu enwunwu oku ge ya gude iya kpee ikpe. O bya etsua jasụ Eze Enyimu tashiḡu; ali kposhihu nkụ. ⁵ Tọbudu iya bu; mu chishia mkpu sụ: “Gube Nnajiuphu, bu Chipfu; te emehenu jiko! ? Denu g'unwu Jiékọpu e-shi waa l'ebe abụ l'ọ baru ishi?”

⁶ O buru iya bu le Chipfu agbanwee eka l'eme iphemiphe ono. Nnajiuphu ono, bu Chipfu bya eyee onu sụ: “Qwaa taa nwukwapho!”

⁷ Wakwa iphe, o goshiru mu baa: Chipfu pfuru l'aguga igbulọ. O buru iphe, o gude l'eka bu iphe, eegudeje akpu igbulọ g'ọ pfuru ọto. O buru iphe, eegudeje akpu igbulọ ono be e gude kpua igbulọ obu. ⁸ Chipfu bya aja mu sụ mu: “Émọsu; ?bu gunu be i humaru?”

Mu sụ iya: “O kwa iphe, eegudeje akpu igbulọ g'ọ pfuru nhamunha.”

Tọbudu iya bu; Nnajiuphu ono bya asụ mu: “Lekwa; mu e-woru iphe, eegudeje akpu igbulọ g'ọ pfuru ọto dobe l'echilabọ ndu Ízurelu. Mu taa haedu phe ozobaa ge mu ta anu phe aphụ. ⁹ Eka aagwaje iphe agwagwa ono, Áyizaku doberu ono be ee-mebyishikota. L'a bya etsukposhia eka ndu Ízurelu doberu nsọ. O buru ogu-echi be mu e-gude tsoo onu-ulo Jierobowamu ogu.”

Émọsu yee Amazaya

¹⁰ Tọbudu iya bu; Amazaya, bu onye uke, l'agwa iphe le Betelu bya ezia ozi g'e je ezia onye eze ndu Ízurelu, bu Jierobowamu sụ

iya: “Émọsu nọakwa l'echilabọ ọnu-ulo Ízurelu gẹdegede achiru ngu ẹjo-idzu. Alì ta asùekwa akùbe iphe, oopfufu. ¹¹ Lẹ-a; wakwa iphe, Émọsu epfugbaa baa: ‘Ọ kwa ogu-echi bẹ ee-gude gbua Jierobowamu; ọphu ọ dukwa iphe, e-me g'a ta kpọ ndu Ízurelu lẹ ndzọ chiru phẹ lufu l'alì phẹ gẹdegede.’ ”

¹² Amazaya bya agbeshikwapho bya ejepfu Émọsu je asu iya: “Tugbua lufu l'eka-a gube nwọphu aphu ọphulenyà! Tugbua laphu azu l'alì ndu Jiuda; je anodu l'eka ono kpata nri, ii-ri; nodu l'eka ono pfu iphe, iipfu! ¹³ Ba noduekwa lẹ Bẹtelu sù l'i pfuchiru Chileke; kele ẹka ono bukwa ẹka duru eze lẹ nsọ; teme ọ buru ẹka ndu Ízurelu kpuru eze-ulo phẹ.”

¹⁴ Noo ya; Émọsu bya eyeeru Amazaya ọnu sù iya: “Mu te eshikwa buru onye mpfuchiru; ọphu ọ bukwa onye mpfuchiru nwuru mu. Ọ kwa onye eche aturu bẹ mu shi buru; bya aburu onye akọ opfu oshi sikamo. ¹⁵ Tọbodu iya bu; Chipfu bya ekua mu l'eka mu nọ eche aturu bya asu mu gẹ mu tugbua je epfuchiru iya opfu ẹhu ndibe iya, bu ndu Ízurelu. ¹⁶ K'ọphu bu lẹ-a; numakwa Opfu Chipfu. G'i suru gẹ mu te epfuhẹkwaru opfu Chileke nù ndu Ízurelu; gẹ mu haa epfu opfu ẹhu ọnu-ulo Áyizaku. ¹⁷ Ọo ya bu lẹ-a; wakwa iphe, Chipfu epfu baa: Nyee ngu e-mechakwaa wata agba ukpara l'oma mkpukpu; teme ọ buru ogu-echi bẹ ee-gude gbushia unwu ngu unwoke mẹ unwu ngu unwanyi. Alì ngu bẹ aa-tù atùtù gude washiaru ndu ọzo; teme

gùbedua l'onwongu bụ l'alì ndu amadụ Chileke bẹ ii-mechaa nọdu nwuhu. Ọzo bụ lẹ ndu Ízurelụ ta adudu iphe, ee-me g'a ta kpụ phẹ lẹ ndzụ chiru phẹ chifu l'alì phẹ."

8

Nkata akpuru-iphe, charu achacha

¹ Wakwa iphe, Nnajiuphu, bụ Chipfu goshiru mu baa: nkata, akpuru-iphe, charu achacha jiru ejiji. ² Ọ bya ajia mu sụ mu: "Émọsu; ?bụ gunu bẹ ì humaru?"

Mu sụ iya: "Ọ kwa nkata, akpuru-iphe, charu achacha jiru ejiji."

Tọbudu iya bụ; Chipfu sụ mu: "Teke ikpazụ kẹ ndibe mu bụ ndu Ízurelụ rwuakwaru. Ọphu mu ahaekwa phẹ ọzobaa gẹ mu ta anụ phẹ aphụ."

³ Wakwa iphe, Nnajiuphu, bụ Chipfu epfu baa: "O -rwua mbọku ono bẹ ebvu, aaguje l'ezeulo Chileke-a l'a-buru uzu-ekwa bẹ aa-nọdu atụ iya. Odzu bẹ a-dụ igwerigwe igwerigwe dakaa l'ekameka. Ekameka adaa nyonyoronyo."

Aanụ ndu Ízurelụ aphụ

⁴ Unu nụmakwa iphe-a; unubẹ ndu azotoshi ndu adudu g'ọ dụ phẹ; teme unu nọdu eme gẹ ndu akpa nri l'alì unu bvubebe; ⁵ mbụ unubẹ ndu asuje: "?Bunaa teke ole bẹ Ọbo Ọnwa-òphúú a-bvunaa; k'ọphu anyi a-wata ere ereshi? ?Bunaa teke ole bẹ eswe-atuta-unme a-bvunaa; k'ọphu anyi a-wata azụ witi?" Ẹphe nọdu emeje tinu ereshi phẹ l'ọ lwa alì; mee aswa iya l'ọ ka shii; bya egude iphe, aatùje iphe, e meru l'ugho gude

eme ndiphe mkpurukpuru-ẹnya. ⁶ Unu egudeje mkpọla-ọchaa zua aswa ishi ndu akpa nri. Teke ọ bu onye adudu g'ọ du iya; unu achita nwa akpokpa labo gude zua aswa ishi iya. Unu nodu akpotaje witi ndu ophu e gege awushi awushi gwakobe l'okpobe iya ree.

⁷ Chipfu gudekwa l'oshilokpa Jiekopu phe eku onwophe ria agụ su: “Mu ta abyakwa azoha iphe, ephe meru. ⁸ Iphe-a e-mechakwaa mee ali anmaa jijijiji. Iphe, bukpo ndu bu iya nu anodu agu aphu iya. Ali-a l'ophu a-bya utso. Aa-kpatsu iya l'ọ bya kulakula g'utso; l'ọ bya alaekwapho pyetee g'enyimu ndu Ijiputu.”

⁹ Wakwa iphe, Nnajiuphu, bu Chipfu epfu baa: “O -rwua mboku ono be mu e-me g'eyanwu riba l'echi eswe; mee eliphe l'ophu agbahụ ochii l'echilabọ eswe. ¹⁰ Obo-iphe, unu aboje be mu a-gbanwe g'unu wata atụ uzu-ekwa. Mu agbanwee ebvu ono, unu aguje ono g'ọ buru erwubvu. Mu e-me unu g'unu hakota unu anmakotaru uwe-aphu; kpushikota ishi anwuhu. Mu emee mboku ono g'ọ du unu g'onye agu aphu nwa nwoke lanu, ọ nwutaru kpoloko, nwuhuru nu. Eswe mboku ono -bya abvu be ọo-tsokotaepho ilu ilu.”

¹¹ Wakwa iphe, Nnajiuphu, bu Chipfu epfu baa: “Mboku abyakwa; mbu mboku, mu e-me g'egu wata eme l'ali-a. Egu, mu epfu opfu iya ta abukwa egu nri; ozoo egu mini. Obenu l'oo egu anuma opfu ke Chipfu. ¹² Nemadzụ e-tSORU aghaphe; o -shi l'enyimu owa-a; l'ọ daghaa enyimu ophuu; l'ọ shi l'isheli; l'ọ ghaphee jeshia l'uzo enyanwu-awawa l'eka ephe achọ eka ephe

a-nụma opfu kẹ Chipfu; ọle ẹphe taa hụmadu iya. ¹³ O -rwua mbọku ono bẹ ẹguru nwanyi, ama ntumatu; yẹ nwokorọbya, gbashiru ike ntumatu a-tulwahu l'ẹka ẹkpiri akpọ phẹ jegiri jegiri. ¹⁴ Ndu ono, gude ẹbyi kẹ Samériya ria angu ono; mbu ndu ono, asuje: 'Eshinu agwa ndibe gube Danu nọ ndzụ g'ọ nọ iya-a'; ọzokwanu: 'Eshinu agwa ndu Biye-Sheba nọ ndzụ g'ọ nọ iya-a'; ndu ono a-dakota; ophu ẹphe abyadu agbeshibaa agbeshi."

9

Ndu Ízurelu bẹ ee-mebyishikwa

¹ Mu phuru ophuleny a huma Chipfu l'ẹka o pfuru l'aguga oru-ngweja epfu su: "Chia iphe l'eli mkpotsu itso, gude eze-ulo-a; k'ophu okpa-ulo iya l'ophu a-nmakota jijijiii. G'o nwukposhihu daa l'eli ishi onyemonye. Nwa ndu ophu phoduru nu buru ogu-echi bẹ mu e-gude gbushia phẹ. O to dudu mẹ onye lanu anahu nu. Ophu o dudu onye ophu byaru agbala nu. ² O to dudu m'obeta ẹphe tuchakpoo nsu tu-rwua alimaa; mu eyekwapho ẹka l'ime ẹka ono guta phẹ. Ophu o dudu m'obeta ẹphe nyihu eli nyirwua imigwe; mu eshikwapho l'ẹka ono lo-zeta phẹ. ³ O to dudu m'obeta ẹphe je edomia onwophe l'eli ubvu Kamelu; mu achilekwaa nta-a phẹ chirwua ẹka ono je akpufuta phẹ. Ophu o dudu m'obeta ẹphe je edomia onwophe l'ohu eze-enyimu; mu akaru ẹjo agwo l'o je l'ẹka ono je atagbushia phẹ. ⁴ O to dudu m'obeta ndu ohogu phẹ kpuchaa phẹ

lẹ ndzụ lashia alị phẹ; noo ẹka mu a-karụ ogu-echi l'o je aphua phẹ tẹerii. Mu a-tabẹe phẹ phọ ẹnya gẹ mu mee phẹ ejo-iphe; ọ tọ bukwa gẹ mu meeru phẹ ree.”

⁵ Ọ kwa Nnajiuphu, bu
 Chipfu; bya aburu
 Ọkalibe-Kakota-Ike;
 onye abujeru;
 o -denyi eliphe l'ophu ẹka;
 l'ọ dazeshihu;
 iphemiphe, bu iya nọ
 aguahaa aphụ;
 alị-a l'ophu abyaa
 utso g'enyimu Nayilu;
 e -mechaa l'ọ daa rigbidii
 gẹ nggele alị Ijiputu.

⁶ Mbụ onye kpushiru
 ọlo-eli iya dobe l'imigwe.

Ọ buru eliphe bẹ ọ turu
 ọkpa ọlo ọbu;
 onye ekuje mini,
 dọru l'enyimu oku;
 l'ọ bya eworu iya
 dzeeru eliphe l'ophu;
 ọ kwa Chipfu bu
 ẹpha iya.

⁷ Wakwa iphe, Chipfu epfu baa: “Unubẹ ndu Ízurelu; unu lẹ ndu Kushi; ?unu ta abudu mu iphe lanu? ?Tobudu alị Ijiputu bẹ mu jeru je eduta ndu Ízurelu; bya eje eduta ndu Filisitayinu l'alị Kafuto; bya edutakwaphọ ndu Arámu l'alị Kiru? ⁸ Tororo, mu egbuẹru iya phọ unu bu l'ẹnya Nnajiuphu, bu Chipfu dukwa l'ẹhu alị-eze

ono, ejo-iphe dụ ono; mbụ ọ mu e-mebyishikọta iya g'ọ tọ dūhe ọ mgboko-a. Obenu l'ọnu-ulo Jiékpọ bẹ mu tee mebyishikwa." Nokwa iphe, Chipfu eepfu.

⁹ "Noo ọkele mu a-tụ ekemu; mu abya anma ọnu-ulo Ízurelu yigayiga nmakofu iya l'echilabọ ọhamoha ọzo woru iya yọo ayọyo ọ n-yọ ẹgube-a, aayọje ereshi-a; obenu l'ọ tọ dudu g'ọ ka mma l'ọo akpuru iya lanu erwu l'ali. ¹⁰ Iphe, bukpo ndu iphe-eji, nọkota l'echilabọ ndibe mu l'a-lakọta l'ogu-echi; mbụ iphe, bukpo ndu ono, anọduje epfu sụ l'eze iphe-ẹhuka tee shiswetakwa ẹka ẹphe nọ; ọphu ọ byapfutakwa phe."

Eedophu ndu Ízurelu azu l'onodu phe

¹¹ "O -rwua mbọku ono bẹ mu e-kpukwakwa ọlo-ekwa Dévidi ono, daru adada ono. Mu emekwaa iphe, bukpo ẹka o mebyihuchaaru emebyihu; bya emekwaa ya g'ọ tọ buhe ochobu; mbụ mee ya l'ọ dụ g'ọ shi adujehawaa; ¹² k'ọphu nwa ndu wafuru nụ ọ ndu Edomu a-buru okiphe phe; yee iphe, bukpo ọhamoha, bu ndu eeku ẹpha mu." Nokwa iphe, Chipfu eepfu; mbụ onye bu iya e-me iphemiphe-a.

¹³ Wakwa iphe,
 Chipfu epfu baa:
 "Mbọku abyakwa;
 mbụ mbọku,
 ee-gudekwadu g'e
 metabebe iphe, e meberu
 l'egu;
 ndu ọkoro awatawaa
 ọkoro;

teme onye azoshi
 akpuru vayinu evuru
 onye emebe iphe l'ali ọzo.

Mẹe ọphúú eshichaa
 l'eli úbvú atashi paapaa;
 mbụ shi l'eli òbvù asọ
 gborogboro.

¹⁴ Ndibe mu ono,
 bu ndu Ízurelu ono,
 a kpuru le ndzu ono be
 mu e-duphutchaa azu.
 Epe abya akpukwachaa
 mkpukpu ono,
 shi bugbaaru ochobu ono;
 bya ebuchishia ya ọzo.
 Epe akọahaa opfu-vayinu;
 nguahaa mẹe, shi iya nu.
 Epe agbahaa mgbabu;
 riahaa akpuru-iphe,
 e meberu iya.

¹⁵ Mu eworu ndu Ízurelu
 dzaa adzadza l'ali
 phe gededede.
 Ophu a byadu ephefubaa
 phe ephefu l'ali ono,
 mu nuru phe ono.”
 Nokwa iphe, Chipfu
 bu Chileke unu epfu
 bu ono.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d